



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tiryimiyim@aolima



tir yimiyim

TAPAK 3



Rara tanabuba mera nung ayaoker: Netanyahu

VOL. XXI NO. 22 (ADOK 22)

DIMAPUR

TENTONÜ (MONDAY)

MONGPUTENI (OCTOBER) 30, 2023

₹ 5.00



Cong-i Telangana nung nangzükba "6 ataloktsütsü: Mallikarjun Kharge

Mizoram nung arogo-i aniba telok ajanga election ketdangsüa repranger

Aizawl, October 29, 2023 (Agencies): Mizoram nung election kanga tiptepa aser lendongsüdong mataloki agia arur aser iba ya Mizoram People's Forum (MPF) ta ser telok kati mapa inyakba ajanga lir.

Mizoram nung arogo temi anir MPF ya 2006 kum tentet aser parnoki election nung sen tashi mamshitsü mesüra tim masüba inyakyim kecha mali ochishia agitsü atema mapa inyaka arur.

Young Mizo Association (YMA) dena political party aser sendaktepa alir ajaki MPF pusema nungita arur.

MPF-i election nung senotsü endokba aser political party tem den parnok candidate tem inyaksangshi mita repranger. MPF-isa candidate temi nübo ayimtsü atema common platforms ayonga agir.

Taküm assembly election nung MPF-i candidate tem dang lokti chiyungba sentong magitsü, senotsü mesüra osettsüset malemstü aser election campaign mapang sen

mesüra oset apua mamshitsü tenokdangba agütsüogo.

Item tetuyuba ya candidate temi senotsü endokba ajemdaktsütsü aser nüboritem dang sen mesüra osettsüset agi mesüzükba nungi jenbua alitsü atema latetba lir.

MPF-i Mizoram nung free & fair elections atema kanga takok ngua inyaka arur. MPF tentetba sülen nungi Mizoram nung election agidang Model Code of Conduct alema mesüra ozüing alema mesüra tim masüba inyakba kecha ataloka mali, ta Election ketdangsürtemi metetdaksüogo.

Mizoram nung MPF maparen ya kanga tongtipang kechiyong state nung Khristantem teimba lir. Mizorm nütsüing yongsük 87% shi ka Khristan lir aser loktiliba nung arogoi shilem tulu agir.

MPF-i free & fair elections agitsü merangba ya India nung tanga state tem atema model ka lir. Arogo, civil society aser political party külemi inyakba ajanga democracy den putepa election maparen inyaka otettsü.

DGC kaketshir 3 züka merenshiba aitsür

Dimapur, October 29, 2023 (TYO): October 28, 2023 aonung mejangjatetba nisung kati Dimapur Government College kaketshir 3 dak sangshiba aitsür ta Dimapur Government College Students' Council (DGCSC)-i metetdaksü.

Ozü kaketshir asemji Oriental Colony, Dimapur nung para ki taseni ki belendang iba lendong atalok. Aonung 10:00 ako meta

mejangjatetba nisung kati atsu adena ait aser kaketshirtem aliba kidangi tur teka sangshidang tetsür kaketshir (B.A 1st Semester) ka süchia ao, ta DGCSC-i sangdong ka nung ashi.

Ozü kaketshirtemi temeten mangu tashi onoki noktaksü aser Indian Penal Code (IPC) nung arrla balala kübok aibelener merenshitsu akhanger, ta DGCSC-isa ashi.

EAC-PM züingsemtemi Ruzhazo yimtsüing semdang

Phek, October 29, 2023 (TYO): October 28, 2023 anepdang Prime Minister (PM) Office atema Economic Advisory Council (EAC) züingsem Sanjeev Sanyal aser Director EAC- PM Devi Prasad Mishra nati Ruzhazo yimtsüing nungi Tüsürü ayong tashi jajaogo.

Yashinep 5:30 ako nungi tenati ghonda ka ser tesadang jaja aser idangji tenati tsüklü aser tzülü aika sema senzü.

State Protocol Officer Dr. Er. Vekho Swuro, Hupasayi Tetseo aser yimtsüing nung taintemi tena meina senzü aser Christian Youth Endeavour (CYE) Ruzhazo Baptist Church ajanga achiajemsü agütsü.

Sanyal aser Mishra tang mezüing atema iba ama jajaba osang lemsatp aser belem yonga tzuratema senzüba metetdaksü.

Sanjeev Sanyal aser Devi Prasad Mishra nati Dr. Er. Vekho Swuro aser Ruzhazo Village Council dang pelaba metetdaksü.

Ruzhazo nungsa Sanjeev Sanyal-i Subhas Chandra Bose aser Indian National Army (INA) Memorial Parking Construction lung azünga yutsü.

Tenatisa Ruzhazo nung Inspector General of Assam Rifles North (IGAR-N) ajanga yangluba Helipad semdang aser iba sülen Kohima-i apusoa ao.

Kalamassery nung bomb apokba bushisüingdangtsü: Kerala CM Tetsur 2 asü; Nisung kati tenüing agia police ket nung agütsü



(Abelen) Dominic Martin (Achiji) Kalamassery nung Deobarnep Zamra International Convention & Exhibition Centre nung bomb apokba sülen agiba noksa angur.

Thiruvananthapuram, October 29, 2023 (Agencies): Kalamassery nung aliba convention center ka nung bomb apokdang nisung 2 asüba aser 40 tema yiruba bushisüingdangtsü atema telok ka shimogo ta Kerala chief minister Pinarayi Vijayan-i Deobarnü metetdaksü.

"Kalamassery nung lendong atalokba atema kanga sasar. Tang nisung 41 anioka anepaludar, Ernakulam Medical College nung nisung 27 anepaludar, 4 anizükogo, nisung 2 süogo aser 5 kanga mejungi yirua lir" ta CM Vijayan-i ashi.

"ADGP Law and Order-i ketdangsüa züingsem 20 agi akümba investigating team ajanga iba lendong bushisüingdangtsü. Asüing party ajak külem senden

ka jatepogo" ta paisa ashi. Deobarnep 9:30 ako meta Zamra International Convention & Exhibition Centre nung IED ka apokdang tetsür 2 pokset aser 40 tema yiru.

Iba sentong ya Jehovah's Witnesses ajanga ayongzükba liasü aser nisung 2,000 tema adenshia liasü.

Union home minister Amit Shah-ia CM Vijayan den jembioigo aser iba bomb pokdaksürtem pua merenshitsu atema Centre-i akokba tashi yariteptsü nangzük.

Ajisüaka, Dominic Martin ta ser nisung kati Kokadra police station nung pai bomb pokdaksü ta shia pa sasa bendanga agütsüogo.

"Iba nisungi bomb pokdaksüba kuli agütsüogo aser

onoki bushisüingdang südar" ta Kerala ADG (law and order) M R Ajith Kumar-i ashi.

Arishi kum 48 tain Dominic Martin-i police ket nung bendanga magütsüingdang social media nung video message ka agütsü aser iba nung pai bomb pokdaksüba aser kechiba pokdaksü onüktem shia lir.

Dominic Martin-i paa Jehovah's Witnesses züingsem ka lir ta ashi.

Jehovah's Witnesses-i ketdangpur anema noktaksü sayutsüingir aser pai parnok melenshitsu atema shiaka tashi manga ta Dominic-isa ashi.

Jehovah's Witnesses ya Khristan tamanger telok ka lir saka parnok ya Protestants masü ta ashir.

U.S. Consul General Melinda Pavek-i Bloom Bazaar semdang



United States Consul General, Melinda Pavek-i "Bloom Bazaar" nung tetsür ka den sensaksemba angur.

Kohima, October 29, 2023 (TYO): United States Consul General, Melinda Pavek-i October 28, 2023 nü "Bloom Bazaar" semdanga liasü.

Investment and Development Authority of Nagaland (IDAN) ajanga Heritage, Kohima nung hopta 30 tashi Bloom Bazaar lapoka lir.

Melinda Pavek-i Nagaland

semdangi arua lir aser Honibarnü lai Bloom Bazaar semdangdang pelashishia agizüka liasü.

Pavek-i Bloom Bazaar nung naru tsünürtem, teka mapa inyakerem aser entrepreneurs den ajurutepa sensaksem.

Nagaland nung alirtemi timtem touthi aremba aser purapitetba angudang kanga süngmanger ta Pavek-i ashi.

United States Consul General-i Bloom Bazaar semdangba ajanga United States aser India tsüingda tesentaktep tajung aliba sayur. Maneni iba ajanga United States-i India nung sobaliba balala den sendaktepa inyaksangshitsu nangzükba sayur ta IDAN Media-i sangdong ka nung ashi.

Melinda Pavek-i Bloom Bazaar semdangba ya sobaliba lemsatpba dang masü saka United States o Nagaland tsüingda rongsenketzüing amalitep aser tesentaktep tajungba akümtsü lenmang lapoktsür ta parnokisa metetdaksü.

Nagaland nung alirtemi US Consul General pelashishia agizükogo aser lai Bloom Bazaar semdangba ya Naga nunger asoshi konang ka ama teti züingshitsu. Lai India nung diplomatic mission inyaka arudang Nagaland semdangba ajanga United States aser Northeast tesentaktep tajungba akümtsü ta IDAN Media-isa ashi.



Akhoya Kaketshir Telongjem Kohima kum tatem senden sentong October 24, 2023 nü akaba mapang Sobaliba sentong nung yimtak nungi putu menden nung tatartem jaoka Akhoya otsü olem, jayajako aser Aor sobaliba indang temetetba aser shisatsü lemsatepba mapang lenirtem den külemi agiba noksa ka yangi angur. Iba sentong nung Akhoya yimsüsür nungi tatar Wb.K.Mangyang aser Wb. L.Akang na shisalen teyur liasü.

2nd Tokhü Emong Bird Count ayonger

Dimapur, Mongputeni/Oct. 29 (TYO):

Nagaland nung Tokhü Emong Bird Count benjong nung shilem agitsü asoshi ozü meimer tem November 4 nungi 7, 2023 tashi adenshia ozü azüngtsü.

Arem-min, tenem tekong balala nung ozü balala aliba benjongtsü nükjiong nung tanabuba Tokhü Emong Bird Count ya Wokha Forest Division and the Divisional Management Unit, Nagaland Forest Management Project (NFMP), Wokha district, aser Bird Count India lungjemer ayongzükur.

Iba benjongmung nungya Department of School Education Nagaland, Foundation for Ecological Security (FES), aser Eco Warriors Nagaland ya partners alitsü. Maneni eBird India aser equipment partner ya Nikon alitsü.

Taküm iba benjongmung nung research partners ama University of Melbourne, Stockholm University nungi Practicing Food Sovereignty

research team aser North Eastern Social Research Centre nungi arua adentsü.

Tokhü Emong ya Lotha kin asoshi aluroba benjong ka lir aser iba benjong ya November mezüng hopta nung munga parnoki asür bilemteter, kidanger aser kinungertem den temeim sayua achi-ajemtsü lemsateper.

Iba benjongmung mapang Nagaland tesem mashi nungi nisung ajaki minute 15 tashi ozüsangnu repranga azüngtsü aser bird recording platform eBird (www.ebird.org/india) nung ozü tenüngtem upload asütsü.

Ozüsangnu züngdanga tenüng bendenba den külemi birdwalks aser online mesüra nisungtem ajurutepa ozüsangnu indang jembitsü.

Iba sentong nung Nagaland nung alirtem dang masü saka alima tesem balala nung alir ajungai shilem agitettsü.

Iba benjongmung dak sensakba nung osang tejangjaba [https://birdcount.in/event/tokhu-](https://birdcount.in/event/tokhu)

emong-bird-count/ nung angutsü mesüra tsünglanglen agüja alirtem den tongteprateptsü akok:

- * Lansothung Lotha (Department of Environment, Forests, & Climate Change, Nagaland). Email: lansothungshitiri@gmail.com; lansothung.lotha@apu.edu.in; WhatsApp: +91-8416005577
- * Mittal Gala (Project Coordinator, Bird Count India). Email: mittal@ncf-india.org; Whatsapp: +91-9024282778
- * Praveen J (Scientist, Bird Count India). Email: praveen.j@ncf-india.org; Call/ WhatsApp: +91-9900028479
- * Joel Rodrigues (Food Sovereignty Research team, Stockholm University). Email: joel.rodrigues@socant.su.se; WhatsApp: +46-735671318
- * Suman W M Sivachar, IFS (Department of Environment, Forests, & Climate Change, Nagaland). Email: dfowokhanf@gmail.com; WhatsApp: +91-7629986993
- * Lesemew M (Eco Warriors Nagaland). Email: lesemewyim195@gmail.com; WhatsApp: +91-8415964715

NSCN/GPRN Ao Region shisadokdena senden amen

Dimapur, Mongputeni/Oct. 29 (TYO): Ao Region National Workers (Civil Wing) shisadokden senden ka October 20, 2023 nü Longphayimsen nung mena liasü.

Iba senden nung Collective Leadership züngsem L. Yanger Pongen-i anir Executive

Members, Steering Committee, Members of Steering Committee, Kilonsers, Dy. Kilonsers, Leacy, Razou Peyu aser Khapur level züngsemtem dena liasü, ta NSCN/GPRN sangdong ka ajanga ashi.

Naga yimten ken o aser August 3, 2015 nü zülutepba

Framework Agreement indang jembidang Ao Region ketdangsür temi Government of India aser NSCN tsüngta yimtenren nung tangatetep arura, Framework Agreement nung ajemdaker alitsüla ta parnoki akangshia pangjemtepa liasü.



Yimnasanger Yaongyimsen aser Asangma Liden Semchir Telongjem Ashijungtep 3 buba senden sentong Asangma yimtak October 27 nungi 28, 2023 tashi amongdang agiba noksa ka yangi angur. Iba sentong nung Longchara Baptist Arogo nung Associate pastor, Wb.Meren Imsongi anir sarasadem mapang tajung agi aser kidong taintemi nungi shisatsü lemsatepa liasü. Ano, iba kasa Ashijungtep senden sentong ya 2028 kum Yaongyimsen nung alitsü lemtet.

Nagaland Angh aser NSCN/GPRN ajanga Chaga Gadi benjong salem lemsatep

Dimapur, Mongputeni/Oct. 29 (TYO): Nagaland Angh, La Ganesan-i sangdong ka ajanga Zeliang nunger adianu aser adianutsürtem den Chaga Gadi benjong salem lemsateper ta ashi.

Alu junga arotsü aser anema alitsü asoshi temoatsü meshia iba benjong ya amunger. Alu tsüksüng-ensünga arotsü, yimchiyimjung aser tesunep ajak madak moajang, ta sangdong ajanga ashi.

Asenoki iba tepela benjong amungdang asenoki maneni asen sobaliba aser yimsüyimbong wazüka yuti.

Tsüngremi Nagaland moajang, ta Nagaland Angh-isa ashi.

Maneni NSCN/GPRN (Akato Chophi) sangdong ka ajanga Zeliang kin den Chega-Gadi/Lamsimngyi/Kwakpo benjong salem lemsatepa liasü. Iba benjong nung lokti chia-jema, pelatepa aser tenüngsang agüja amunger aser iba benjong nung sobaliba tajung sayur, ta ashi.

Ochishiba, akumtsüboba, meranga inyakba, tasü aitba aser dangar dang aria bilemba tanüla nem nenok anidakjang, ta NSCN/GPRN (Akato Chophi) sangdong ajangasa ashi.

Kiset shiruru metsüba indang orientation sentong agi



2nd NAP Battalion Alichen nung October 28, 2023 nü kiset shiruru ketdangsüba indang orientation agidang tangokba noksa ka nung tongtipang nisungtem aser iba sentong nung adenertem angur.

Kohima, Mongputeni/Oct. 29 (TYO): 2nd NAP Battalion Alichen ajanga Rashtriya Gokul Mission (RGM) kübok Chief Veterinary Office Mokokchung Livestock Management senton October 28, 2023 nü Battalion Headquarter nung agia liasü.

Iba sentong ya "Fertility Camp" omen nung ajemdaker agi, kong shisalen sayur ya Dr. B. M.

Sunep, CVO Mokokchung; Dr. Yanger, Vety Farm Manager aser Dr. Wati, Vety. Asst. Surgeon nungertem liasü.

Iba sentong nung azü, an aser padak nem angati vaccine agüja liasü.

Scientific yimya nung ak metsüba, Bio fencing, dietary components aser metsü junga jakzüksü asoshi inyakyim balala sayua liasü. Iba sentong nung nisung 98 dena liasü.

Nagaland State BJP tiri district tem sema jajar



Dimapur, Mongputeni/Oct. 29 (TYO): Nagaland State BJP tir tasenba Benjamin Yephthomi-i pa asoshi mezüngbuba 'Official District Touring Program' October 28, 2023 nü Mon Town nung tenzüka liasü.

State Office Bearers (SOB) Team tasenbai meina aoba State BJP tir ya Mon Town nung Mon District BJP party ketdangsür aser karyakartas temi agizüka liasü.

Mon atongba den külemi State BJP tiri Helsa Cottage nung Mon District BJP ketdangsür den senden ka amen aser iba sülen ano 43 Tapi Assembly Constituency nungi bye-election

nung NDPP candidate Wangpang Konyak'er kidang lokti senden ka mena liasü.

Iba sülen parnoki Minister, Health & Family Welfare, Paiwang Konyak den ajurutepa par kidang senden ka amen.

Maneni kasa anogo pai Ex. MLA Lanpha Konyak'er kidang 43 Tapi A/C BJP Mandal aser Booth Level ketdangsürtem den senden ka mena liasü.

Nagaland State BJP tir Benjamin Yephthomi asoshi mezüngbuba Official District Touring Program ya November 29, 2023 nü Dimapur nung tembangtsü, ta sangdong ka ajanga ashi.



October 29, 2023 nü Jantar Mantar, New Delhi nung CPI(M) General Secretary Sitaram Yechury aser Kerala Chief Minister, Pinarayi Vijayan na den tangartemi Israel-Palestine rara anema longkak aيتدang tangokba noksa nung angur.

CPI(M) lenirtemi Gaza Strip nung tangsa rara anentsü akhanger

New Delhi, October 29 (Agencies): Kerala Chief Minister aser CPI(M) lenir, Pinarayi Vijayan-i UN General Assembly nung Palestine nung nem teyari agütsü atema rara anentsü atema bangzüng ka renema vote agütsütepba nung India-i shilem magiba atema aitsüogo.

Amongnü Jantar Mantar, New Delhi nung Communist Party of India (Marxist)-i Gaza Strip nung rara anema longkak aيتدang Vijayan-i, "Israel pusema India-i UN bangzüng nung shilem magiba ajanga onok aoksar," ta ashi.

"Tanü asenoki Palestine nung jenti tepsetba kuli süa angur. Tai maket nisungtem tepseter. Asenoki iba ya maitsüra asenoki ibaji pusemba

den kasa," ta pai ashi. Vijayan-i, "India-i Palestine nung taginüba pusemer, ajisüaka UN nung vote agütsüdang shilem magiba ajanga ibaji anemer. Iba ya asenok tangatetba nungi khenyongi balaka," ta ashi.

Kerala chief minister-isa tangsa rara anentsü takhangba agütsü.

CPI(M) lenirtem, Polit Bureau aser Central Committee nung züngsemtemi party headquarters nunga Palestine nung pusema longkak aitogo.

CPI(M) lenir, Sitaram Yechury-i, "Israel nungeri Palestine nung tepsetba ya tangsa anentsüla, ibaji CPI(M) tangatetba. Nisung jenti tepsetba ya onoki magizükettsü," ta ashi.

Yechury-isa, "Israel-i Gaza Strip nung Palestine nung jenti tepsetba ya tangsa anentsü atema takhangba agüja tanü longkak aittsü atema central committee-i telemtetba agi. Tang tashi nung nisung 8,000 dak tema süba sangdonger. Tanurtem-a aika tepsetogo. Ki chirepba jana agi ano nisung kwi rembanger aliar asenoki memetet. Iba ya meimchir dak mapet. UN-i meimchir temeim atema ayongzükbaji mapa küma inyaksüla," ta ashi.

CPI(M) lenir, Brinda Karat-i, "West Bank amakba ajanga Israel nung tepsetba ya West Bank nung Hamas züngsemtem ali asü?, aser ibaji ajanga parnoki West Bank-a amaker asü? Israel-i item ajak ya US-i pusema inyaker," ta ashi.

Oct. 30 nü SC-i Sisodia indang bail temepishiba atema telangzüba agütsü

New Delhi, October 29 (Agencies): Delhi excise policy ochimashi ken o dak sendakba nung taoba mapang Delhi Deputy Chief Minister, Manish Sisodia-i bail temepishiba agüja lir; ajioda October 31 nü Supreme Court-i bail temepishiba atema telangzüba agütsü.

Justices- Sanjiv Khanna aser SVN Bhatti nati akümba bench-i bail temepishiba dak sendakba nung ken o angadanga aruba sülen tetuyuba agütsü.

AAP lenir, Manish Sisodia-i tawa Supreme Court nem bail temepishiba agüja liasü. Delhi High Court-i pa indang bail

temepishiba aiben magizükba sülen pai SC nung kasa temepishiba agütsü.

Ken o angadanga mapang nung Enforcement Directorate (ED) aser Central Bureau of Investigation (CBI) tenüng nung jembitsür Additional Solicitor General SV Raju-i, iba ken o ya ita 9 nungi ita 12 tashi nung tembangtsüa akok, ta metetdaksü.

Sisodia indang bail temepishiba anema ASG-i, PMLA kübok Arrla 45 nung ajemdaker kanga koda masüba ken otem nung ang bail agütsü akok, ta ashi.

Sisodia atema ken o

jembitsür Senior Advocate, AM Singhvi-i Supreme Court dang, iba ken o dak sendakba Sisodia anema agütsüba kuli ajakji 'documentary' amai dang lir, ta shia pai SC dang Sisodia nem bail agüjang, ta mepishi.

Taoba mapang Delhi excise policy ken o dak sendakba nung taküm February ita nung CBI-i Sisodia pua liasü. Opposition-i kanga ashishiba sülen Delhi excise policy ji agienogo. Tang Sisodia judicial ket nung lir.

CBI-i ashiba agi, ozüing alema inyaksü asalentong yangluba nung Sisodia-i tongti shilem agia lir, aser iba policy yangluba nunga pai shilem agia lir.

Oct. 31 nü linük tesem ajaklen 'Mera Yuva Bharat' tenzüksü: PM

New Delhi, Mongputeni/October 29 (Agencies): Amongnü Ato kilonser, Narendra Modi-i, Sardar Vallabhbhai Patel asoba anogomong- October 31 nü linük tesem ajaklen 'Mera Yuva Bharat' tenzüksü, ta metetdaksü.

Ita shia radio ajanga linük nüburtem den jembiba 106buba 'Mann Ki Baat' nung Ato kilonser Modi-i, "October 31, Sardar Saheb asoba anogomong nung linük nung organization tuluka atema foundation amenoktsü. Iba organization nungjaji 'Mera Yuva Bharat' lir, aser ibaji 'My Bharat' lir. Iba organization ajanga India nung lanurtem nem linük yangerba sentongtem nung shilem agidaksütsü atema maongka agütsütsü. Iba mapatong ya terenlok India yangertsü atema lanur tashi amshitsü atema lir. Mera Yuva Bharat indang website My Bharat-a tenzüksü. Ni lanurtem

dang sentong balala nung adentsü atema MyBharat.gov.in nung register asütsü ayongzüker," ta metetdaksü.

"October 31 ya asenok ajak atema anogo tajung ka lir. Iba anogo nung asenoki Iron Man Sardar Vallabhbhai Patel asoba anogomong amonger," ta pai ashi.

Modi-isa, October 31 anogo ya taoba mapang Ato kilonser, Indira Gandhi asüba anogomong lir, ta shia asür nem akhüm agütsü.

Modi-isa, Lord Birsa Munda asoba anogomong- November 15 nü linüki Tribal Pride Day amongtsü, ta metetdaksü.

"Linük nüburtemi November 15 nü Tribal Pride Day amongtsü. Iba anogo ya Lord Birsa Munda asoba anogomong lir. Asenok ajak melungjang nung Lord Birsa Munda lir. Pa taküm ajanga asenoki chichiba tasütaitji kechiar angazüker," ta Modi-i ashi.



October 29, 2023 nü Bhopal nung Madhya Pradesh assembly election atema nüboyimba mapang Union Home Minister, Amit Shah-i Raja Bhoj nem akhüm agütsüdang tangokba noksa nung angur.

Cong-i Telangana nung nangzükba 6 ataloktsütsü: Mallikarjun Kharge

New Delhi, October 29 (Agencies): Telangana nung Chief Minister, K Chandrasekhar Rao-i aniba sorkar ajanga shirnok tajangzük angü?, ta asüngdanga Amongnü Congress Tir, Mallikarjun Kharge-i, Telangana nung Congress-i takok ngua sorkar kümra party-i state nung nangzükba onük trok mapa küma inyaksü, ta metetdaksü.

November 30 nü Telangana nung assembly election agütsü lia Amongnü Sangareddy constituency nung election nüboyim sentong ka nung jembidang Kharge-i Telangana nung Congress-i nangzükba onük trok rasa-a metetdaksü.

Telangana Chief Minister Chandrasekhar Rao aija Kharge-i, "KCR-i pai inyknüba ajak inyaker, aser ibaji ajanga shirnok tajangzük angü?" ta asüngdang.

"Ibaji ajanga kaketshirtem, tetsürtem aser aluyimertem tajangzük angü asü? Ibayongji Congress-i nenok dang onük trok ya nangzük," ta pai ashi.

Congress party-i Karnataka nung nangzükba ajak ataloktsür ta shia pai, "Onoki nangzükba ama inyaker, saka nenoki vote atema dang nangzükba sülen

oadoker," ta ashi.

Karnataka nung Congress-i nangzükba onük pongu mapa küma inyaker saka BRS lenirtemi ibaji mamanger, ta shia, Kharge-i, Telangana Congress Tir, A Revanth Reddy-i bus tajung ka anepalur BRS lenirtem Karnataka-i anir oa onoki nangzükba ama inyakra kuli sayutsü, ta ashi.

Congress-i mapang ajak nung sensakertem atema bilemstür, ta pai ashi.

Congress-i dang sensakertem, kaketshirtem, aluyimertem, tetsürtem, Scheduled Castes aser Scheduled Tribes nüburtem atema bilemja inyaker, ta pai ashi.

BRS sorkar maneni aija Kharge-i, BRS sorkar ajanga tesüba küm 9 tsüngda Telangana state atema sentsüh 5 lakh crore tsüloktüogo, ta ashi.

Paisa, Ato kilonser Narendra Modi aser Union Home Minister Amit Shah nati dang Congress anema jembia liasü, saka tanü-asüngbo BRS lenirtemia Congress anema jembir, ta ashi.

Telangana state tentetba ya Sonia Gandhi ajanga lir aser lai Telangana nung taginüba ataloktsü, ta Congress Tirisa metetdaksü.



October 29, 2023 nü Chhattisgarh nung Congress lenir, Rahul Gandhi-i aluyimertem den külemi alu aruhdang tangokba noksa ka nung angur. Amongnü Sanskardhani Rajnandgaon aser Kawardha na nung pai election nüboyim lokti senden ana nung shilem agia liasü.



TIR YIMYIM YIMOBILEM (EDITORIAL)

DIMAPUR TENTONÜ, MONGPUTENI (OCTOBER) 30, 2023

Tetsüngdai aier telok nüngdaker

Kodang nisung ana tsüngtepa raratep tenzükdir, kenpiga tsüngteperbo aniadoker aser meraratepner saka tebendangtsür melira raratep anentsü tasak, kechiyong tebur tsüngtep tenzüker shibabo jena aotsü ? Aser shibabo alima tsüngdang lapi kümnütsü ? Iba ama tensa tia ka nung India den Naga yimten tebilemstü ken o jembiba ya lir amai repranger. Joko, mapang talangka rarar aser yimjung nung ken o a tejembitsü tashibo ajak benoka jembir alitsü, saka tang tashi tatem kati maruteter. Iba ama tia ka nung ajurutepyonga kechi jembitsü (?) ta asüba tebilemstüang tuluba kümer alitsü südi. Atangji, Naga nung yimten nüchiso bushirtem rongnung telok aika lemsar liaka, India government den jembirbo tongtibang telok ana dang lir, kaji NSCN-IM aser kaji NNPGs. NNPGs tetezü Naga National Political Groups. Iba telok yabo ka dang masü saka telok aika agi ka kümer India den jembitsü asoshi longjemba telok lir. NNPGs aser India government nabo tejembitsü tashi benoka jembir tangatettep ken o nung meyongnem anemstüba dang lir, ajisüaka NSCN-IM telok o India government na tangatettep kati marutetba agi atapisar, kechiyong India government-i Naga yimten tebilemstü ya telok ka den khen, ano telok ka den khen ta tangatettep ken o meyangluner. Atangji, aji shitak lir, kechiyong telok aika aliyonga tebilemstü onükbo ka dang, anungji telok aika aliyonga külemi kenü senden ka nung Naga yimten onük ya latetsü tim. Ajia ajaki bilemer aser tonga lir, ajisüaka tasak kaji NSCN-IM teloki Naga nung temzüng aser wako balaka asütsü tim ta akanger aser aji Indiai memulunger. Iba tatsütep onükji kodang bilemdangdir, telok anaprongla benokba onükji pei pei meten shitak dang lir ta angatetsü. Atangji, Naga yimten onük ya jembia jembia Naga yimten nüchiso indang masü saka India den külemi tangatettep tajung ka lateta yur alitsü indangang jembir amai angateter. Aji oda, India o NSCN-IM na tsüngda Framework Agreement yangluba anogo nung India ato kilonser, Narendra Modii jembiba angadagra, Naga nungertem ya India kübok putu tasen ka nung jangratema lia aotsüba indangang jembir amai angateter. Aji India tangatetba. Ajisüaka, NSCN-IM tangatetbaji Naga nung yimten ya India kübok masü saka India den tangatettep nung lia aotsüba indang jembir amai jembir, kechiyong parnoki Naga nung temzüng aser wako balaka alitsü tim ta akanger. Ajisüaka, India government-i bilemba amaji süra, India kübok liabo India temzüng nung tang arla 371 A aliba amaibo litetsü saka Naga nung atema temzüng aser yimten wako balaka alitsüabajibo tasak asütsü. Tang India government o NSCN-IM na yangji tsükdaka lir. Iba onükji dang masü saka Manipur, Assam aser Arunachal Pradesh nung Naga nung aliba lushi aser nütsüng yimten ka küboki maitdaksütetsü. Iba ama tensa tia ka nung Naga yimten nüchiso jenjang agütsüyonga tayudak makaba tia ka nung asenok lir. Iba nungji asenok Naga yimten ken o tepdaka lir. Iba amaisa ao nungbo Naga nung nüchiso bushir kata mali küma, kar alima nungi piladoktsü aser kar business inyaker kümadoktsü. Iba tia ya meteta asenok nübertemi India government o Naga yimten teloktem na tsüngda tebilemba ken o tajung bener itetsüla. Joko, parnoka ajak anigo aser ojang raratepner saka tebendangtsür maliba tensa tia ka nung parnok lir. Parnokji asenok tiyongi irr mebendangtsüra parnok tsüngda rara manenba agi parnok masü asenok nübertem dang akoksatsü. Atangji, ashir ashi, kodaser repranga lia Naga yimten onük tazüngla nung samadaksütsü ? Jungli mejungli küm paikaya arem nung ali aser süngolio mejaka tetsü tasoli atema taküm bendanga agüja inyakba anogotem kodaser amadoktsü ? Item ajakji asadanga, Naga nung yimten aser alushi ka kübok melongjemtetaka, Naga nung ta asüba agi longjemtettsüsa yimten lenmang ka asenoki bushia parnok anitetsü nüngdaker. Idangji dang India o Naga nung tsüngda yimten ken o kümsa küm jembia aruba ya, tang atemabo, tatem kati arutetsü.

OLEMSABANG

“Asenok ali-i meyoka lir asemang.” (Züngdangba 16:34)

~ Rev Dr. Mar Pongener, Executive
Secretary, ABAM

Sarasadema adianutem den Tsüngremer tejembiba aser pa temeshi o dak rangloker timtem aser lendongi asenok menepba marudang tali kümdangtsü aser tanela nung saksalema alitsü atema iba tayongzükba lemsateper. Levi kidong nungi Kohat chir Izhar jabaso Kora, pa den Reuben kidong nungi Eliab jabsotem Dathan aser Abiram, ano Pelet jabaso On, parnoki Israel chirtem nüngtoko kar shimteter telok tanishir noklang ana ser tenem (250) külemi bangjemer Mosa aser Aron anema apuso. Kora ya Levi kidong nungi aser Tsüngremi Levi chirtem Yirusalem Tenla Ki kishinükertem asütsü shimtet (1 Putipuyang 9:17-27.) Iba ya Levi chirtem asoshi Tsüngrem nungi anguba maongka tulu liasü. Saka Kora chirtemi parnok nem lemsütsüba menden jagi tenük mesüngi Mosa aser Aron nem lenisütsü menden aser putir mapa agütsüba nükshia bilem aser nemnemstü tenzük. Mosai Kora dang ashi, Israel pur rongnungi nenok shimteta Kibuba tekülemdak süki nung tenzüktsü aser telok jakdang nokdaka parnok tenzüktsübaji nenok asoshi atamata dang ta bilemer asü? (Zün 16:9) Item o angashidang Kora mepela aser tamajung tasa asa-a Tsüngrem anema mapatem inyaksü atongtet.

Iba ya Tsüngrem sentong anema inyaker ta aiben Mosai angatetdaksü saka Kora aser pa chirtemi Mosai pei sasa ulua bilema mapatemji inyaker ta angatet. Anungji Mosai ashi, “... ni pei mulungba agi inyaker masü, item mapa ajak inyaksü Kibubai ni yok...” (Zün 16:28). Saka telok tulu senteper Mosa aser Aron anema ola adok. Tenati tena sasa tali ulua akümer ta teyazü külitem bendena taitsubatem aika agütsür alitsü. Mosai ya tashi angatetdaksütsü merangaka, maneni Kora aser medemertemi Mosa anema nemnem. Mosai Tsüngremer sentong indang aser tekümdangtsütem jembizükli, parnok nokdaka aliba kübok aliji sadanga lapok aser ali-i pei tebang lapoka parnok ajak (Kora aser medemertem 250) aser oset ajak meyokadok. Anungji parnok aser parnok den adener ajak taküm dang Sheoli alu (tejen lai mapang nung nüburtemi tasürtemji ali telung nung tamangdaki aor aser iba tesem dang “tasürtem lima” mesüra “Sheol” ta aja.) Ali-i parnok manung shibang aser telok nungi parnok sama. Iba tetsübuttsü aser tebangkatsü tatalokbaji angudang, Israel nung ajaki ayimtena jena oa ashi, “Asenok ali-i meyoka lir asemang.” (Iba tatalokba indang tejangja angatetsü asoshi Züngdangba 16:1-35 sarasadema züngangma).

Adianutem, kechiba iba ama tebangkatsü lendong ya atalok? ta tongmelang agi angatetsü merangdi. Israel chirtem timtem tekangshi tali akümdang parnoki teyari asoshi Tsüngrem dang nunga ayimten. Parnok alar tia nungi tanungba olaji Tsüngrem dangi atu. Tsüngremi parnok tanungba olaji angashi aser Abraham, Isak aser Yakob den pa tezüngzüktepba ayuba bilemtet (Anitet 2:23-25). Mosai pa sasa uluba masü saka Israel nung Egypt alar tia nungi anitetsü aser parnokji anishitsü Tsüngremi jatet. Tsüngremi mulungba ama pai jembia aser inyaker (Anitet 3). Tsüngremi ashibatem angaa Mosai nüburtem anishi. Tsüngrem jashitsüsa inyakdang Mosai nüburtem artsü. Tamajung tasa asatepba inyaksangshiba angudang Mosai songtem. Mashileni aodang lenmang jimia maotsü tekümdangtsü otem ashi. Teyazü süngyanglutem yanglua külemdang pai aitsü. Mosai Tsüngremer sentong angateta mapatem inyakba angudang Korai Mosa aitsü aser pa lenisüba anema nokdak.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Kerala nung Khristanem sentong ka nung nisung ka pokset; 36 yiru



October 29, 2023 nü (Amongnü) Kerala nung Ernakulam district kübok Kalamassery area nung aliba Samra International Convention Center nung Khristan telok ka lokti senden agidang bomb asem apokba sülen tangokba noksa nung angur.

Thiruvananthapuram, October 29 (Agencies): Amongnü Kerala nung Ernakulam district kübok Kalamassery area nung aliba Samra International Convention Center nung Khristan telok ka lokti senden agidang bomb asem apokba lendong nung nisung ka asü aser 36 yiruogo.

Iba lendong agütsüba dak sendakba nung nisung kati pasasa pai aibelenba police matsüngdangi oa nangzükba sülen police-i bushisüngdang tenzükogo.

Iba lendong nung yirur nisung 36 nungjagi parnok 18 bo Ernakulam district nung aliba Government Medical College-i anir oa yaridar. Nisung asembo kanga mejungi yirua lir aser arrshi küm 14 tanur kabo meküzmüktettsüsa lir, ta police-i metetdaksü.

Anepdang 9:40 ako meta Jehovah's Witnesses sentongji sarasadem ka agia tenzüksü lia sentong agiba sabang nungi süklep 15 (metre 5) shi dang pilar bomb ka apok; iba sülen ano bomb ana apok, ta tenük kuli alirtemi metetdaksü.

Mezüng bushisüngdangba ajanga bomb asemji improvised explosive device (IED) asütsü ta jangjaogo. Nisung kati pasasa

pai bomb asemji pokdaksü, ta nangzükba pasasa police matsüngdangi ao. Paji-a Jehovah's Witnesses telok nung züngsem dang liasü.

Kerala Director General of Police (FGP), Shiek Darvesh Sahib-i, "Mezüng bushisüngdangba ajanga item bomb ji IED liasü ta jangjaogo. Bushisüngdangba maparen tembangba sülen ang osang tejangja metetdaksütsü aser aibelener nem temerenshi tulu agütsütsü. Nisungtem dang social media nung tangar jashidaksütsüsa osang meproksü mepishir," ta metetdaksü.

Ano külen Kerala Additional Director General of Police (ADGP), MR Ajith Kumar-ia, "Nisung kati police matsüngdang pai aibelenba nangzükogo. Pa tenüngji Dominic Martin lir aser pai nangzükba ama pai kuli-a agütsüogo. Pa ya Jehovah's Witnesses nung züngsem ka lir. Onoki maneni iba tatalokba bushisüngdangtsü," ta metetdaksü.

Jehovah's Witnesses indang anogo asemnü sentongji tanü (October 29) agi tanünübuba agir liasü. Iba sentong nungji nisung 2,300 shi dena liasü.

Tang Kerala Chief Minister, Pinarayi Vijayan Delhi-i oa lir. Osangbenertem den jembidang pai, "Iba ya tia maka tatalokba ka lir aser sorkari iba tatalokba ya süoki ia agütsü. Onoki osang tejangja metetba sülen nenok den lemsateptsü," ta metetdaksü.

Chief minister-isa Hombarnep 10:00 ako nung Secretariat complex nung party ajak senden ka ayongzükogo.

State chief secretary, M V Govindan-ibo, iba ya kiralongraba lir, aser iba ya Israel-Hamas rara den sendaktepa lir, ta metetdaksü.

Tenük kuli alir kati ashiba agi, "Sentong agiba tesem tiyongtsü nungji bomb ka apokba sülen maneni bomb ana atongtepa apok, aser ibaji ajanga mi tulu adoka liasü. Tetsür ka iba tesem nungjisa rongseta asü aser hall telung nungjagi lokti ajentsü merandang nisung aika yiruogo," ta metetdaksü.

Nisung ka tenüng agi, Devassy Kutty-i, "Ni-a convention hall nungji ozü kibong züngsemtem den külemi liasü. Iba mapang nungji bomb apok aser mi adok. Ni ozü tanurtem anir ajen. Tanur ka dakbo mi eplok saka onoki miji enseptet," ta metetdaksü.

Arogo lenirtemi teyari agütsütsü atema rara anena atatsü mepishir

October 29, 2023: Arogo 20 aser Khristan organisations balala nungi lenirtemi külem sangdong ka ajanga Gaza Strip nung timtemertem nem teyari agütsütsü atema tangsa rara anena atatsü atema temepishiba agütsü; parnokisa sorkartem dang tangsa rara anendaksütsü atema inyaksüla, ta mepishiogo.

United Nations General Assembly (UNGA)-ia Gaza Strip nung timtemertem nem teyari agütsütsü atema rara anena atatsü asoshi bangzüng ka renema vote agütsütepogo. Iba bangzüng pusema vote 140 agütsü aser iba bangzüng anema vote 14 agütsü. UK aser India densema linük 45-ibo vote agütsüba nungji shilem magi.

UK nunga nisung aikati Israel-Hamas rara anentsü atema ayongzükker. Tan hopta tatembanglen

London nung nisung 100,000 shi adenshia rara anentsü atema takhangba agüja longkak aitsü sentong lir.

Ajisüaka Foreign Secretary, James Cleverly-i, "Item takhangba ajanga kecha masütsü, kechiyong Hamas-i rara anentsü tebilemba mali," ta shiogo.

Rara anentsü atema ayongzükba Arogo aser Khristan organizations ji teimbaka British Isles, Ireland, Scotland, England aser Wales nungi lir.

Parnoki külem sangdong ka ajanga, "Metetsümonga nisung tepsetba, yirutsüba aser

civilian puer aobaji kecha agia metentsütsü makok; aser item ya International law kübok ozüng alema inyakba mapa lir, anungji aibelenertem anema inyaksüla. Onokisa October 7 nü Hamas teloki Israel amakba sashia aitsür," ta metetdaksü.

Israel sepaitemia Gaza amak tenzükba sülen tang tashi nung civilian tiemba asür. Israel sorkari asalentong yanglur bomb amshia amakba ajanga tai maket Palestine nungertemi timtem tulu ajangshidar. Mokdanga yur amakba ajanga nisung aika tejenokdak mali aser kanga timtemdar," ta parnokisa metetdaksü.

Parnoki sorkartem dang tangsa Israel aser occupied

ANO GO ABEN TSÜNGREM DEN

Yihova Tezüngzükba

T. Ken 144:1-8

Kechiba takoksang Tsüngremi asenok dak temulung agütsür? Pa taochi agizüktsüsa asenok shirnok? Dawidi iba tasüngdangba tekong 3 nung asüngdang. "Kibuba nai meimchir metettsüsa kechi lir? Mesüra nai nisung chir züngshitsüsa kechi lir?"

Tsüngremi asenok züngshitsüsa asenok kechi lir? Asenok teyakyak asü? Shiruru karbo asenok dang nungi tashi taitba lir. Asenok temeshi asü? Masü, asenoki Tsüngrem anema temenen mena. Asenok tamang katetba lir asü? Aiben asenoki Pa dang tashi manger. Meimchir tangatetba tsütsü nungi Tsüngremi asenok menungratsüsa asenok dak kecha maket. "Nisungji tangula ka dang mesüka lir; Pa anogotemji süia aoba akhüm ka mesüka lir" (t.4). Teti takümji mokozü alungba mesüka lir. Parnok angur idangjisa parnok oadoker.

Kechiba Tsüngremi asenok dang temulung agütsür? Kechiaser Pa taochi aser yimli bilem agi asenok dang meimer. Idaki Dawidi Tsüngrem amshiba tetezü Yihova Tsüngrem, taochi tezüngzükba akaba Tsüngrem ta amshiba lir. Pai asenok dang tenangzükbatem nangzük aser parnoki pa dak amangtsü akok. Dawidi Pa "Kü mulung aser kü mitsa, kü tashi tait lungki aser kü kümzüksüba, kü jong aser Pa dak ni jenokdak bushir" (t.2) ta rasaa ashi.

Ibai asenok asoshi rasaa ashitsü kanga tarok miim o lir, saka metettsü asoshi asenok asoshi kanga tarok masü. Kechiba Tsüngremi asenok dang temulung agütsür asenoki mangatettsü akok, saka Par chir kilir ka asütsü aru ta asenoki metet. Pa kangki nung asü, asenok asoshi tenla agütsü, aser tang pa kotak nung lir, asenok asoshi mepishitsür.

Tsüngremi asenok dak temulung agütsür kechiaser Pai asenok meimer aser asenok taküm ajanga pa sentsüwangshiner. Pa den jajaang aser ne taküm Pa sentsüwangshidakjang.

Palestinian territory nung rara anendaksütsü atema inyaksü mepishi.

UN ajanga ashiba agi, tesüiba hopta asem tsüngda Gaza Strip nung Palestine nung 7,000 dak tema asüba jungnüa yiruogo.

Taoba hopta Khristan hospital- Al Ahli Anglican Episcopal hospital amakba sülen Khristan melungtet telok Christian Aid-i International Criminal Court (ICC) dang iba tatalokba bushisüngdangtsü takhangba agütsüogo.

Gaza nung Christian Aid indang medical partners-i, "Tangbo onoki tanüngba hospitals atema-a tebilemtsü akar, kechiyong item hospital-a azüngtettsür oadokang ta

tuyua lir. Talisa Al Shifa hospital nung yirurtemji Gaza nung yirurtem tesadang shi lir.

Totzü maliba ajanga hospital aika shibangadoktsüa akok," ta metetdaksü.

Christian Aid indang Middle East Policy & Advocacy tongti, William Bell-i, "Khristan lenirtem aser Khristan Organisations dak alia Christian Aid-ia tang pua alir ajak chiokang ta akangba den külemi International Criminal Court dang rara mapang ozüng alema inyakba mapatem bushisüngdangtsü akhanger," ta metetdaksü.

Ano külen tanga osang ka ajanga ashiba agi, Israel-i tzü, totzü aser mozü abenba trucks Gaza telungi yoktsü melatsü, ta nangzükogo.

AO OSHI ANGAZÜKDAK:

TANÜ ANGAZÜKTSÜBA OJANG



Sashinemshi

(adv) jabangmayim, mazüok (indisciplined)
* Sashinemshi purtemi lokti nem timtem agütsür.

Sasong

(n) yim süngküm anasa süng aser au agi shiruru marudaktsüsü yangluba (wooden and bomboos spikes around village to trap animals.)

* Sasong nung arem shiruru aika yirur meyipa aoer.

OLONG PAITEP # 6680

1				2				3		4
5		6								
							7			
8										
										9
		10					11			
				12				13		
14										
							15			
16										

TIPIEN

- 2. Auonungchiyongsüasenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüng
- 3. Tenarong maten
- 4. A ___ g
- 6. Mopung apodoka
- 9. Tongtipang tagitsü
- 10. Menungra bilem
- 11. Aiür
- 13. S ___ k
- 14. T ___ r

OLONG PAITEP # 6679 TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem,
- 15. Tambu, 16. Khuret,
- 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.

NAI-A YA METETTER MA

ICC cricket asayadang shibai run timtiba yanglutetdir 'most run scorer' pa nem ji "Golden Bat Award" sempet agütsür. Iba sempet ya 1975 küm nungi tenzüka agü arur. 2019 küm tashi nung yamai Golden Bat Award angyrtem yamai:

Top Runscorer	World Cup	Runs	Country
Glenn Turner	1975	333	New Zealand
Gordon Greenidge	1979	253	West Indies
David Gower	1983	384	England
Graham Gooch	1987	471	England
Martin Crowe	1992	456	New Zealand
Sachin Tendulkar	1996	523	India
Rahul Dravid	1999	461	India
Sachin Tendulkar	2003	673	India
Matthew Hayden	2007	659	Australia
Tillakaratne Dilshan	2011	500	Sri Lanka
Martin Guptill	2015	547	New Zealand
Rohit Sharma	2019	648	India

Amit Shah-i PM Modi melena Mizoram semdangtsü



Amit Shah

Aizawl, October 29, 2023

(Agencies): Prime Minister Narendra Modi-i October 30 nü Mizoram semdangtsü aliba athiba melena Union Home Minister Amit Shah-i semdangtsü.

Amit Shah-i PM Modi

melena arutsü saka pa arutsü anogo ano melemtet lir, ta state BJP media convener Johny Lalthanpuia-i ashi.

Ajisüaka Lalthanpuia-i PM Modi kechiba marutsü'ar osang kecha mashi.

Mizoram nung November 7 assembly elections atema BJP lannir tejen aser Union minister Nitin Gadkari-ia Hombarnü state semdangi arutsü ta Lalthanpuia-i ashi.

Amit Shah-i Mamit aser Mizoram anüolentip tsütsü semdangtsü ta paisa shisem.

BJP-i Mizoram anüolentip tsütsü alir Chakma, Bru, Mara aser Lai nunger mesüzüksü meranger.

2018 assembly election nung BJP-i Mizoram nung menden 39 nung toktepa liasü saka taküm election nungbo parnoki candidate 23 dang shimteta lir.

BJP president JP Nadda-i Hokolbarnü BJP manifesto sayaogo aser iba nung sorkar mapa nung tetsür nem 33% lemzüksütsü aser Assam den arrtsü ken o angatetteptsü nangzüka lir.

PM Modi & Bangladesh PM nati Agartala-Akhaura Rail Link lapoktsütsü

Agartala, October 29, 2023

(Agencies): India Prime Minister Narendra Modi aser Bangladesh Prime Minister Sheikh Hasina nati November 1, 2023 nü Agartala-Akhaura Cross Border Rail Link Project lapoktsütsü.

November 1 anepdang 11:00 ako nung PM Modi-i PM Sheikh Hasina den külemi

Agartala-Akhaura Cross Border Rail Link Project aser Khulna-Mongla Port Rail Line Project lapoktsütsü ta osang angazüker.

Iba sentong nung Union Minister of Railway-i Railway Board Chairperson aser IRCON CMD na den iba sentong nung adentsü.

India aser Bangladesh

Prime Minister temi Agartala-Akhaura Cross Border Rail Link Project lapoktsütsü saka iba ya Bangladesh tsütsü atema lapoktsü kechiyong India tsütsü ano mapa metembang lir.

Agartala-Akhaura Bangladesh connectivity project atema Indian Railways-i Rs. 153.84 crores lemzüksütsü lemtetogo.

Abhinash Kalita tepsetba sülen ano ULFA-I züngsem ka tepset

Guwahati, October 29, 2023

(Agencies): Pathsala nungi United Liberation Front of Asom-Independent (ULFA-I) züngsem Abhinash Kalita-i Myanmar kübok tesepe nungi jena aotsü merangba atema tepsetba sülen ano ULFA-I züngsem Tanmoy Bora (Dwip Axom) tepsetba osang angazüker.

ULFA-I-i lanur ana tepsetba osang angashia Assam nung nübertem temulung mesüngjemeteter.

Tanmoy Bora ya Assam

kübok Nagaon district nungi lir ta osang ajanga ashi.

"March 9, 2022 nü ozü jabaso Abhilash Kalita-i ULFA-I nung züngsem aküm. Pai tesepe toktsür jena aotsü merangba atema tepset ta onoki tawa tu ang osang angashi. ULFA-I Commander-in-Chief Paresh Baruah taküm lira iba indang osang jangjatsütsü ayongzüker" ta Abhilash'er tsüraburtemi metetdaksüogo.

ULFA-I züngsem ka tesepe

nung tepsetba osang angashiba sülen Assam Director General of Police GP Singh-i lanurtem dang telok tamajung nung dennür taküm amajok mekümdaktsütsü ayongzüko.

"Tan-a otsü kasa dang. Parnok memelenshitsu. Assam nungi lanurtemi tashiyim amshiba telok ka nung madentsü merangang. Iba telok nung nü taküm amajok dang. Imlibilema teden" ta DGP GP Singh-i ashi.



Bachendri Pal-i anir "Fit@50+ Summits and Steering Wheels" teloki Kaziranga National Park semdangdang agiba noksa angur. Iba telok nung arishi küm 50 ser tema tetsür 14 dena lir aser parnoki Deobarnü UNESCO World Heritage Site semdang. Tata Steel Adventure Foundation (TSAF)-i Indian Army aser Ministry of Tourism den yaritepa 'Fit@50+ Summits and Steering Wheels' sentong tembangogo. Arishi küm 50 ser temapur tetsürtemi anogo 18 Himalayan adventure agiba ajanga parnok tasü aitba aser bendanga agütsüba kuli sayur. Iba sentong ya veteran mountaineer, Padma Shri & Padma Bhushan awardee Bachendri Pal lenisüba kübok agi. Iba sentong ya October 12 nü NIMAS, Dirang nungi tenzüka tanü Kaziranga National Park nung tembangogo.

Rara tanabuba mera nung ayaoker: Netanyahu

Tel Aviv, Mongputeni/Oct. 29 (Agencies): Israel sepaitem aser armoured vehicles tem Gaza telungi aiba mapang, linüki Hamas den raraba 'stage' tanabubai ayaoker, ta Israel Ato Kilonser Benjamin Netanyahu-i ashi.

Honibar aonung Tel Aviv nung osangbener den jembidang, Israel nung dang mapang talangka aser kanga saka raratsü asoshi renemtsü ashi aser iba rara ya 1948 sülen linük nüjiso asoshi tanaben rara lir ta ashi.

"Ibai rara stage tanabuba lir aser nükjidadongji tejangja - Hamas tashi aser sepai samatsütsü aser pua alirtem kidangi anir arutsü," ta Netanyahu-i osangbener dang ashi.

"Asenok tang ang tenzüker. Asenoki ali tema aser telung nung tsükchurtem samatsütsü."

Sepaitem iba tesemi aitsü asoshi lenmang müreka Israel nungeri tanen makai bomb poklokja aser osangtsüsang agiba ajunga amai shibangtsür lia Netanyahu-i iba o ya ashi.

Alinük ajungalen muketbanger aliba Gaza nungya telephone aser internet communications tem tanemi lapoktsür ta Palestine nungeri Deobarnü ashi.

Israel-i Gaza Strip eastern

asert northern tsütsü bomb pokloktsüba tali tesashiba akumer ta Khan Younis nungi osangbener kati Hokulbarnü shia liasü.

"Iba amai amakba ajanga alinung aliba Israel sepaitem ibalitsü telungi aitsü asoshi temelaba agütsür," ta Abu Azzoum-i ashi.

Hokulbarnü nungi Gaza north tsütsü sepai aser armoured vehicles tem oa operation agitar ta Israel mitkar lenirtemi ashi saka alinung operation agiba ya 'amakba' amabo mejembir.

Israel indang mitkar temitang tashi alinung operation sademabo magir.

Ajisüaka arütsülen sepai 300,000 dak tema anidenba sülen Israel-i tashi sayua amaktsü südi ta bilema aser jembia aruba ama tang tashibo meinyaki lir.

United States Tir Joe Biden indang administration ajanga Israel dang alilen nungi iba tesem amaktsü sentong metenzüki alitsü ajungshir, kechiaser civilian aika asütsü, region nung tensa tamajungba akumtsü aser Hamas temi pua alirtem asoshi bilemstür.

Gaza nung chiyongtsü, tajemtsü tzü aser mozü agi anüngba ajanga meimchir asoshi timtem tali tuluba

akumtsü tsübo alidang Israel sepaitemi tali tesashiba nung amaker.

Osangtsüsang peria magitetba ajanga rara nung mapa tamajung inyaker aser meimchir temeden anema inyaker jembudaktsütsü ta nüburtem yariba lokti tentet temi ashir.

Iba tebilemstü jembishinütsü asoshi United Nations Security Council Hombarnü adenshitsu lir.

"Asen tenüki ngua 'humanitarian catastrophe' adoktar," ta UN Secretary-General Antonio Guterres-i Deobarnü ashi.

October 7 nü Hamas-i Israel nung dang amakba langzua Israel-i Gaza nung bomb pokloktsüba ajanga nisung million 1.4 dak tema peiki yutsür tesem balala nung jenoka lir ta UN-i ashir.

Israel-i tayimtsü amshia bomb poklokja amakdang Palestine nung nisung 7,703 dak tema takum samaogo aser yangji tila-tanur 3,500 dak tema lir, ta Hamas-i amokbanga aliba Gaza nung ketdangtsür temi ashir.

Hamas-i Israel tesem balala nung amakdang civilian timba sür nisung 1,400 dak tema tepset ta Israel ketdangtsür temi ashir.

KIBUBA DANGI ORR KÜM KA AJUNGBA BILEMTETER



S. TAKOLA (Longkong)
9th Aug. 1943 - 30th Oct. 2022

Temeim Oja, nai onok toktsür orr küm ka ajunger, saka onok mulungjang nungi na kodanga mepilar. Nü tamang, sarasadem, shisatsü, temeim aser menürem jakden onoki mamateter. Nai inyakba mapa tajungtem bilemteta tanü onoki nü nem tenüngsang agüja sarasadema amonger.

Nai akümlidang inyakba mapa tajungtem kodanga mesamatsü. Na meliaka nü tawabangba akhüm kübok onok teti alir. Na teti tatem maka dak tesünep nung aliba meteta onok mulung süngzüker.

Kodanga amadoktsü makokba
Temeim Kinungbo, Chirnur, Semchir aser Anükapang

Mike Pence-i 2024 US tir election nungi atsünger



Las Vegas, Mongputeni/Oct. 29 (Agencies): Taoba mapang US tatong tir inyaka alidang Mike Pence 2024 tir election nungi atsünger aser 'tangya kü mapang masü' ta ashi.

Pai iba sangdong ya Honibar nikongdang Las Vegas nung Republican Jewish Coalition nung metetdaksü.

"Iba tongpang ya tesashi asütsü ta asenoki meteta liasü, saka ni mesasar," ta pai sangdong nung ashi.

Taoba tir Donald Trump-i anir nübuyimba sentong nungi thinener Republican candidate tejangja nübu Pence ya mezüngbuba alitsü.

Tawa polls agiba nung Pence-i jenjang tajung mongutet aser Republican voters temi pa dak tamang makar.

Pa nübuyimba mapang sentsüh ang tali atsüh aser September ita tatem tashinung pa sentsüh sen \$621,000 (£512,038) liasü aser bank nung sen million \$1.2 (£989,446) dang liasü - koba danga Republican candidate tem dang kanga agi tajemba liasü.

"Ni iba campaign yutsür, saka ni kodanga conservative values asoshi raraba meyutsütsü," ta pai sangdong ka pa bhukumer dangi züluba nung shia liasü.

2021 küm January 6 nü Capitol sapangba mechi yimjak nung pai Trump den pilaba aser Joe Biden-i 2020 election nung takok anguba kulizüng Congress nung ketdangtsü agiba sülen Republican voters aikati arishi küm 64 tain Pence dang mepelai akum.

Democratic lenir Biden-i takok anguba melenshitsu memolungba yong Trump-i Pence dang tasümayt aja.

2021 küm Congress telungi aiter kari 'Mike Pence lisü agi alensetang' ta ayimtena liasü aser iba sülen Trump sülen anidaker aikati pa ya ashiocktsür ka ama züngshir.

Ki o jen raksaja jajatsü aser Capitol sapangtsü Trump-i ajungmesoba ajanga iba anogo ozü kibong aser Capitol nung alir ajak lendongi yok, ta Pence-i March ita shia liasü.

Pa tir election nung metokteptsü sangdongba mapang pa sülen anidaker dang Republican nungi dangar candidate yaritsü mashi.

Saka America nung dang takok leni aniba lenir kisung masü saka tesüiba mapang ama linük akhümka aser tashi ita anitsüla lenir shimtsü ayongzuka liasü.

November 8 nü presidential debate tasembuba alitsü mapang tatsüka lia Pence-i Republican presidential campaign nungi ainshir.

Kazakhstan mine nung mi adoka nisung 42 asü

Kostenko, Mongputeni/Oct. 29 (Agencies): Kazakhstan nung aliba mine ka nung mi adoka nisung asür 42 jungogo.

Steel giant ArcelorMittal meyong Kostenko mine nung mi ya Honibarnü adok aser mezüngbo nisung 32 asüba osang sangdonga liasü.

Ali anenzüka alua aliba aser jana nungi ano nisung tasümayt agitetba sülen ministry of emergency situation ajanga tang tesüsaba osang ya sangdonga liasü. Shilem kar raksar aliba mine nung ano nisung pezü samar aliba bushiba mapang lir.

Kilometre 4 dak tali pilar tesem ana nung minertem

samar alibatem bushir.

"Ali atoba oset raksar aliba aser tesem kar nung longsang aliba ajanga search operation nung tetsükdaksü ajurur" ta ministry ajanga sangdong ka nung ashi.

Luxembourg nung amenoka aliba ArcelorMittal indang local unit ArcelorMittal Temirtau ajanga ashiba agi, Kostenko mine nung nisung 252 aliba nungi nisung 206 anitetogo.

Kazakhstan nung amenoka aliba iba company indang mining operations tem nationalise asütsü asoshi tezüngzüktep yangluba kasa anogo methane apokba ajanga adok südi ta bilema aliba mi ya

adoka liasü.

Kazakh Tir Kassym-Jomart Tokayev-i iba lendong matalokdang nationalisation asoshi inyaktsü atema linük nung steel mill tulutiba nung sen indokba anena atatsü totuyuba agütsür liasü.

Pai mangyimer kibongtem den asükhu lemsatep aser linük nung sorkar aser enterprise tsüngta tesendaktep tsütsü iba company indang local unit ArcelorMittal Termitau ya tamajungtiba lir ta shia liasü.

"Onoki iba enterprise asoshi telemtetba ka agitsü atema shisadangtsü," ta pai osangbener dang ashi.

(Maneni tapak 8 nung...)



Japan anüolen Osaka nung G-7 Trade Ministers' Meeting amenba noksa nung angur. Takait democracy linük tenet nungi shishilembar aser rongsenketzüng ketdangtsürtem adenshia energy aser chiyongtsü amala supply chains tajungba kumdaaktsütsü asoshi külemi inyaktsü parnoki Deobarnü züngzüktepa liasü.

10buba KDVA asayamung ayonger

Kohima, Mongputeni/October 28 (TYO): Kohima District Volleyball Association (KDVA)-i sangdong ka ajanga, 10buba KDVA tournament 2023 November 27 nungi 30 tashi Indira Gandhi Stadium, Kohima nung asayatsü ta metetdaksüogo.

Iba asayamung ya Youth Resources & Sports department den longjemer asayatsü, ta asayamung ayongertemisa metetdaksü.

Iba dak sendakba nung volleyball asayatem aser team tem renema alitsü asoshi KDVA-i metetdaksüogo.

Kasa mapang nung iba asayamung atema KDVA-i organizing committee ka tentetdaksüogo. Iba committee ya Mhalehou Mere (convenor) lenisüba nung inyaksangshitsü, kong Khriesilie Khoubve-Co-convenor, Ketosü Rikha-Secretary den Seyielhoukho Sechü, Vikeduo Seyie aser

Khrietuo Dahou na züngsem asütsü aser Visasielie Suohu Ex-officio asütsü.

Technical Committee nung Neivikhotuo Vielie-Convenor, Visapa Yongo-Co-convenor, Neikhrielie Mere aser Khriezotuo Tapa (züngsem) aser Mhalevilie Kere Ex-officio asütsü.

Publicity Committee nung Sedevilie Chietsü-Convenor, Chizokho Vero Ex-officio aser Notsol Neikha o Vikhozolie Rülho na züngsem asütsü.

Technical Committee nung Neivikhotuo Vielie-Convenor, Visapa Yongo-Co-convenor, Neikhrielie Mere aser Khriezotuo Tapa na züngsem aser Mhalevilie Kere Ex-officio asütsü.

Publicity Committee nung Sedevilie Chietsü-Convenor, Chizokho Vero Ex-officio aser Notsol Neikha o Vikhozolie Rülho na züngsem asütsü shimogo.

Ground Management Committee nung Convenor Kekheneituo Kere asütsü, Neikhozotuo Zhünyü-Co-convenor aser züngsemtem rongnung Savilie Kire, Kelhousetuo Sere, Thepfuvizo Seyie, Visakuolie Kengurusie, Sedevi Khrabvü, Visedelie Kulnu, Vizosielie, Asao Kire, Kezevisie Punyü, Kevisetuo Savino, Vizobeilie Punyü, Megovizo Visienyü, Vitsilhoukho Suohumvü, Vikho Naprantsu, Keneinguzo Medoze, Mhiesilie Rhitso, Zekho Casavi, Adolie, Neichütuo, Vilesü Mekro, Asakho Tenyi aser Vikhotuo Yongo nung densema lir.

Maneni Announcer Committee nung Kekhrieneikho Zhünyü Convenor aser Vitsikuolie Kehie na asütsü.

Mess Committee nung Keneilezo Sechü-Convenor aser Keneiwelie Merhieso o Keviselhou Peseyie na züngsem asütsü.

India den T20 asayamung atema Australia team captain asütsü Wade shimogo



Mongputeni/October 29, 2023 (Agencies): November aser December ita India aser Australia na T20 asayatsü aliba atema Australia team captain asütsü asoshi Matthew Wade shimogo, kechiyong T20 captain Mitch Marsh Cricket World Cup tembangba sülen kidangi meyipa aotsü.

Marsh lenisüba nung Australia T20 team tawa South Africa den asayaogo saka pa test captain Pat Cummins, all-rounder Cameron Green aser fast bowler Mitchell Starc aser

Josh Hazlewood nung den külemi kidangi meyipa aotsü.

Pakistan den December 14 nungi tenzüka Test asaya asem asayatsü aliba atema renemshitsü asoshi item asayatem kidangi meyipa aotsü. Australia team ano West Indies den test ana asayatsü lir.

"Asaya nung asayar tejen aser tasen meyoktepa lir. Asayar tasen karbo tang mezüngbuba international jenjang nung asayatsü asoshi maongka nguogo aser onoki maneni asayar tongtibangtem

anitetsü merangtsü," ta selector tem rongnung tekolakba George Bailey-i ashi.

"Matthew-i taoba mapanga captain mapa benogo. Pa ya iba telok nung lenir ka lir aser pa lenisüba nung iba asayamung asayatsü yongya atar," ta paisa ashi.

"Team nung asayatem timba India nung asayaba tajangshiba bener alirtem lir, kong reserve asayar Tanveer Sangha densema tang ODI World Cup team nung züngoksema aliba asayar ti lir," ta Bailey-i ashi.

Josh Inglis, Sean Abbott, Travis Head, Glenn Maxwell, Marcus Stoinis aser Adam Zampa nung iba asayamung nung shilem agitsü atema kidangi meyipa maotsü aser David Warner o Steve Smith nata team nung züngoksemogo. Tena South Africa den asayatsü asoshibo meshimi liasü.

India aser Australia na asaya pongu asayatsü aliba ya November 24 nü Visakhapatnam nung tenzüksü aser December 3 nü Hyderabad nung tatembangsa asayatsü.

Phek nung Nov 4 nung Open Road bicycle rally agitsü

Kohima, Mongputeni/October 29 (TYO): 'Rally of Phek' ta nungja agütsür November 4 nü Phek district kümteter küm 50 ajungba nungdem nung open road bicycle rally ka ayongzüka agitsü.

Iba rally nung nungtugu rider Ronel Khundrakpam (National medalist), Shiven (2times national championship), Ashish Sharpa (current U-23 national champion) aser Thotmahan Awangshi (National medalist) nungeria shilem agitsü jangaogo.

Rally ya Glory Peak, Pfutsero nung tenzüksü aser Phek jila nung tembangtsü.

Iba rally ya Phek District Golden Jubilee Event Committee-i ayongzüker aser Department of Tourism, Nagaland-i sponsore asütsü.

Rally dak sendakba nung osang tejangjaba agitsü aser online ajanga tenung züngoksemtsü asoshi iba t o n g t e p r a t e p t s ü metetdaksüogo. Tenung züngoksemtsü atema tatembangbuba anogoji October 30 nü asütsü.

Iba rally ya arishi küm 15

nungi temapurtem atema open asütsü.

Tetoktepa nung takok angur nem senpet sen 70,000 aser tanabuba aser tasembuba jenjang nung tembangba asayar nem senpet sen 40,000 aser 20,000 agütsütsü.

Maneni asaya ter nem sen 5000 consolation prizes agütsütsü.

Iba rally ya MLA Dr. Neisatuo Mero-i November 4 anepdang 10:00 ako nung Pfutsero nung tenzüksütsü. Kasa mapang nung sempet agütsüba sentong ya November 4 nü Phek jila nung 1:00 ako nung agitsü.

Sempet agütsüba sentong ya ADC aser PTC administrator Ruopfukuotuo Noudi lenisüba nung agitsü aser tetoktepa indang osang Neitho Khamo-i agütsütsü.

Sentong nung District Tourism Officer S. Peter Trakha-ia o tatsüka jembitsü aser Phek Deputy Commissioner Kuko Mero-i takokertem nem sempet lemtsütsü.

Maneni sentong nung Chakhesang Public Organization (CPO) tir Vezuhii Keyho-i tepela o jembitsü.

India tetsür hockey team mental conditioning coach asütsü Haberl shimogo

Mongputeni/October 29, 2023 (Agencies): Hockey India-i Honibarnü tetsür national hockey team mental conditioning coach asütsü atema Peter Harberl shimogo.

Haberl ya Colorado Springs, USA nungi lir aser pa ya licensed psychologist ka lir. Pa India tetsür team chief coach, Janneke Schopman den külemi inyaktüsü.

Heberl ya taoba mapang team tajung aser asayatem den inyakogo. Pa medal anguba team aser asayatem den Olympic Games teku tashi nung shilem agiogo.

Taruba küm January 13 nungi 19 tashi Ranchi nung FIH Olympic Qualifiers asayatsü lia Haberl shimba ya team asoshi tajangzüker tulu asütsü.

Haberl ya taoba mapang ice hockey asayar ka liasü aser pai asayatem timtem ajangshiba aser pressure koda agitettsü iba indang jangja lir.

Pa mezüng 1996 nungi 2006 tashi US tetsür ice hockey team indang sports psychology consultant ama pa indang career tenzüker, iba sülen 2001 aser 2005 tashi US Olympic Committee indang sport

psychologist mapa inyaker aser 2005 nungi 2023 tashi US Olympic aser Paralympic Committee senior sport psychologist mapa bena liasü.

Haberl shimba indang jembiba mapang Hockey India tir Dilip Tirkey-i, "pa ya professional ka lir aser pa shimtsü asoshi aikati shiogo," ta ashi.

"India tebur team atema mental trainer ka shimba sülen kasa tajangshiba bena aliba nisung ka tetsür team asoshi bushia liasü aser Haberl ya kanga tapet lit. Pai Janneke Schopman nem teyari agütsütsü asoshi tenüngdakba shisatsü bena lir aser asayatem temaba jenjang tongtettsü atema teyari agütsütsü," ta tir-i ashi.

India tetsür hockey team den inyaktüsü yongya ataba indang lemsatepa mapang Haberl-i, "ni mapa tenzüksü matateter. India tetsür hockey team ya kümttem tsüngda kanga renloka odar aser parnok temabg jenjang tongtettsü atema teyari agütsütsü asoshi ni anisemba ya jangrademtsüka lir.

"Ni team yaritsü atema bendanga agütsür lir," ta pai ashi.

Kazakhstan mine nung mi adoka...

(Tapak 7 nungi...)

ArcelorMittal-i ketdangtsür ten amalitep akatsü aser compensation agütsütsü nangzükerogo.

Nationalisation atema mezüngbuba stage tenzükerogo aser iba maparen akok tashi tekeraba nung tembangtsü meranga inyaker, ta ashi.

Mozüki nung aliba nisung 15 ya carbon monoxide miim asoshi temang anepalur ta regional

health department ajanga ashi. Russia Tir Vladimir Putin-ia par tembar Kazakh den asükhu lemsatepa liasü.

"Asür kinungertem den asükhu lemsatepa osang sangokjang. Ali telung nung aliba miners tem kumzüksü imla atar," ta pai sangdong ka nung ashi.

Kazakhstan nung ArcelorMittal-i amenoka aliba

mine nung ita ana tsüngta ibai lendong tulu tanabuba ataloker alitsü. August ita Karaganda mine nung mi adoka miner pezü asü.

Aser November 2022 nunga kasa mine nung methane gas ajanga nisung pongu asü aser pezü mozü kidangi aotsüsa akum. Kazakhstan nung ArcelorMittal Temirtau meyong mijang aser yin tazü agitetba mine 15 lir.

BILEMDANGANG

"Mejembi tsüngda bilemdangang; mebilemdang tsüngda züngang."